



FASNACHTSCLIQUE

JUNTERESSLI

Fasnacht 2024

S wirft e Schatte voruss!

S Gfüül, wo grad hesch, isch unhaimlig, gäll?
Grad isch s no bunt gsii und wunderbar häll.
Wird s dunggel in dir und rund um dii umme?
Dien d Döön, der Lärm und d Stimme verstumme?
Nur in dym Kopf do duet s no rumoore,
die Raabe, so fürchtisch, die wänn jetz go boore.
Die kömme do z laufe, als Schatte voruss
Gscheit und prophetisch und glyych kunnsch nit druss...

Es wärfe die Raabe, lueg do gnau aane,
e Schatte voruss, denn kasch es eraane.

Bilder erschyne vo Grieg und Zerstöörig,
Kanone duesch gsee und Mensche wo höörig
de Mächtige, Ryyche und Priester verdraue.
Iss e Stügg Schoggi, s isch schwäär das z verdaue:
Die machtgaile Männer, wo haimlig agiere,
Fürst, wo ganz offe geg s Volgg dien regiere,
die unhaimlige Gstalte, wo nochäär verzelle
du sygsch sälber tschuld, du haigsch es doch welle.
Dyini Dämoone, sy schryybe in bruune
Lettere "Freyhait" – und das no als Ruune.

Es wirft dy Angst, dass es gnau so duet koo,
e Schatte voruss und du gseesch en koo.

Bi Liecht bedrachdet gieng s dir jo guet,
nur wo isch dy Hoffnig und wo isch dy Muet?
D Armuet kasch gsee, überall uff der Ärde
Jetz soll au dy Lääbe no düurer wärde.
Dy Woonig, dr Stroom, bisch nur no am zaale
Nur mit dym Loon kasch niene me braale
Denn sottsch halt mee schaffe, jä das isch der Dangg:
Kai Zyt me für dii und wirsch au no grangg.
Der grossi Knall, äär kündet sich aa.
Du kasch di nur frooge: Wenn bisch du draa?

S Alter, der Dood, es schlyycht sich scho glyy
e Schatte voruss – und scho isch s verbyy.

S näggscht Schattewääse macht Angscht, s wird dir bang:
Der künstlich gross Brueder, dä waiss jo scho lang
wie s dir goot, was du machsch, bisch schliesslig us Glaas,
zerbrächlig und faal, rauchsch du sogar Graas?
Was kaufsch yy, was dänggsch und wäär findsch du toll?
Hesch öbbis aagstellt und wie oft bisch voll?
Dr Stegger kasch nit zieh, will dief in dir inne
nur du waisch was isch oder ob scho duesch spinne.
Bisch druurig, süchtig oder aifach nur fuul,
duesch digital so, als wärsch doch ganz cool?
Em aigene Schatte brobiersch dervoo z renne.
Das goot nit, gsee s yy und höör jetz uff flenne.

Du wirfsch uff der Suechi noch dym aigene Wääse
e Schatte voruss, e dunggle und jääse.

Du seensch dy noch Uszyt, noch Sunne und Palme,
kai Industrie und Maschiine, wo qualme.
Duesch dräume vom Flugi ins Luxus-Resort.
Und hoggsch dört am Strand, denn fääle diir d Wort.
Die wo dört lääbe, die hänn alli s FÜR
dört hii z go wo d häär kunnsch, für die isch das düür.
Die, wo no blyybe, mien allewyyl hoffe,
iiri Döchter und Söön syyge noonig versoffe.
Do kunnt öbbis nööcher, erkennsch es, s isch z spoot
Es isch scho lang kippt, das unglügglig Boot.

Es wird dir jetz glaar, das kasch nüm bestrytte:
Nur im Schatte erkennsch d Sunnesyte.

Hesch gmaint sygsch im Paradyys gsi und doch
wachs uff und findsch dy in dym graue Loch.
Der Abgrund hesch gsee, wien är nüm schlimmer goot,
die grööscht mööglig Angscht, die läämendi Noot.
Was macht das mit diir und wie goot s jetz wyter?
Kasch d Lambbe umdräie oder blybts eso schytter?
Dy Angscht isch berächtigt aber darf nit bestimme
über dii und dy Lääbe, dr Hass duet sunsch glimme.
Due gnau aaneluege, au in schlimme Zyte,
denn gseesch au vom Schatte die anderer Syte.

Es wirft zum Glügg au s Guete und Ächte
e Schatte voruss und nit numme s Schlächte.

Wachs uff us dym Draum und stoosch widr uff
Gumbbsch über dy Schatte und luegsch nomol druff.
Do waggst uss diir uuse datsächlich e Pflänzli,
e zarts, ganz durstig und s suecht für sy Ränzli
wie du en Oase, wo Glügg bringe duet
und Liecht in s Dunggel und Wille und Muet.
Du hebsch dy do draa, machsch dii uff dy Wäg,
belüchtisch was kunnt, eso blybsch du zwääg,
beobachtisch s Gschee wie d Raabe dört oobe,
duesch s Böös gritisiere und s Schööne au loobe.
Du waisch, du kasch nie ganz alles verhindere,
aber doch, wenn sy koo gseesch, d Dunggelhait mindere.

Alles wirft, für uns und für dii
e Schatte voruss. Wo fiehrt är dii hii?

Mechtsch aafoo Pfyffe oder Drummle, bisch mindischdens
7 Joor alt und hesch Luscht zem sälber Fasnacht mache?
So mäld dy lieber hit als morn bim Obmaa vo de Junge, em
Nicolas Bringolf nicolas.bringolf@gmail.com oder kumm
diräggts ans Yschryybe an dr 1. Lektion im Glaibasel
vom 2. Meerz 2024, 10:30 bis 14:00. Mir freuen ys uff Dii!
